

Vischnaunca da Mustér

**Regulativ per la
cumissiun da gestiun**

I. Status giuridic dalla cumissiun da gestiun

- Art. 1 Posiziun
2 Pretensius, premissas optimalas
3 Scolaziun
4 Post da controlla extern
5 Responsabladad

II. Organisaziun

- 6 Egalitad dallas schlatteinas
7 Cumposiziun, perioda d'uffeci
8 Convocaziun
9 Indemnisaziun
10 Cumpetenzza da decider
11 Recusaziun
12 Documents da controlla, protocollaziun

III. Dretgs ed obligaziuns

- 13 Incumbensas
14 Repartiziun dallas incumbensas
15 Gener e termin dalla controlla
16 Dretg da survegnir informaziuns e da prender investa
17 Experts
18 Cussegliaziun e recumandaziuns
19 Obligaziun da discreziun

IV. Termins, rapport e proposta

- 20 Termins
21 Rapport e proposta

V. Determinaziuns finalas

- 22 Entrada en vigur

I. Status giuridic dalla cumissiun da gestiun

Art. 1 Posiziun

La cumissiun da gestiun (numnada cheu sutvart CdG) ei igl organ da controlla suprem dalla vischnaunca. Ella ei suttamessa directamein alla cuminonza dils votants. La CdG ei buca in organ d'execuziun ed ha neginas cumpetenzas independentas d'administraziun e da decisiun.

Art. 2 Pretensiuns, premissas optimalas

Ella CdG vegnan eligidas sche pusseivel persunas cun enconuschientschas specializadas specificas. Silmeins in commember duei haver enconuschientschas commercialas fundamentalas.

Art. 3 Scolaziun

Cun acceptar in mandant dalla CdG sedeclara mintga niev commember promts da frequentar in cuors da scolaziun supplementar, aschilunsch ch'el ha buca las enconuschientschas specializadas necessarias. Ils cuosts che resultan da quei vegnan surpri dalla vischnaunca.

Art. 4 Post da controlla extern

La cumissiun da gestiun sa en concordanza cun la suprastonza communal incumbensar revisurs externs cun l'examinaziun dil quen communal. Las incumbensas dil post da controlla extern vegnan fixadas annualmein tenor cunvegnientscha cun la CdG. Il post da controlla extern ei suttamess directamein alla CdG ed ei obligaus da dar informaziuns a quella.

Art. 5 Responsablidad

La CdG e ses commembers stattan buns tenor las disposiziuns dalla lescha davart la responsablidad dil stadi (LRS; DG 170.050) enviers la vischnaunca per donns ch'els ni ch'expertas ed experts externs, ch'els han nominau caschunan. Il dretg da prender regress ad experts externs ei garantius per ils sbagls da quels.

II. Organisaziun

Art. 6 Egalitad dallas schlatteinas

Las indicaziuns davart persunas, funcziuns e professiuns en quei regulativ serefereschon ad omisdus schlatteinas.

Art. 7 Cumposiziun, perioda d'uffeci

La CdG consista da treis commembers che vegnan eligi alla votaziun all'urna. Ella seconstituescha sezza cun fixar in president ord da siu ravugl a caschun da sia emprema seduta. La perioda d'uffeci e l'entrada en uffeci sedrezzan tenor la costituziun communal.

Art. 8 Convocaziun

La CdG vegn convocada – indicond las tractandas – entras il president che fixescha las uras ed il liug dallas sedutas. Mintga commember ha ultra da quei il dretg da pretender ina seduta.

Art. 9 Indemnisaziun

L'indemnisaziun dalla CdG sedrezza tenor il regulativ d'indemnisaziun dalla vischnaunca.

Art. 10 Cumpetenzza da decider

La CdG sa prender decisiuns, sche silmeins dus commembers ein presents.

Art. 11 Recusaziun

Ei valan las regulaziuns da recusaziun tenor la costituziun communal.

Art. 12 Documents da controlla, protocollaziun

Tut ils documents da controlla ston vegnir teni en salv duront silmeins 10 onns. Davart las controllas ch'ei vegnidas fatgas sto vegnir menau protocol.

III. Dretgs ed obligaziuns**Art. 13 Incumbensas**

La CdG examinescha la gestiun dils organs e dils emploiai communal, il preventiv ed il quen annual. Sia survigilanza cumpeggia tut ils secturs dalla direziun dalla vischnaunca. Ultra dalla controlla dil quen annual (bilanza, quen current, quen d'investiziun ed aschunta) sco era d'eventuals quens separai examinescha la CdG era il preventiv e giudichescha la fixaziun dil pei da taglia. Ella examinescha la planisaziun ed il svilup dils projects d'investiziun (surdada dallas lavurs, surpassaments da cuosts e da credits), mussaments, cudischaziuns, scuntraziuns e pagaments e suvigilescha periodicamein il traffic da cassa. Sch'ella constatescha irregularitads fa la CdG directamein in rapport a scret per mauns dalla suprastanza communal.

Art. 14 Repartiziun dallas incumbensas

¹Sch'ei vegn nominau in post da controlla extern per la revisiun dil quen, san las duas instanzas secunvegnir davart ils secturs da controlla. La CdG sestenta per ina accordanza e repartiziun dallas incumbensas aschi pratica sco pusseivel.

²Per quei intent fa la CdG sias controllas annualas en collaboraziun e tenor cunvegnientscha cun il post da controlla extern.

Art. 15 Gener e termin dalla controlla

Agl organ da controlla stat ei liber co el vul exequir sia lavur. El sto fixar sez il termin dallas controllas e far controllas da mintga sparta administrativa cun ni senza annunzia. Medemamein decida la CdG libramein en tgei cass ch'ei sto vegnir fatg ina controlla detagliada e cumplessiva ni ina controlla d'emprova. La finamira ei da tractar tut ils secturs duront ina perioda da plirs onns. Sco principi vala che la revisiun dil quen annual sto vegnir terminada avon ch'il quen annual sa vegnir suttamess al cussegl da vischnaunca.

Art. 16 Dretg da survegnir informaziuns e da prender investa

La CdG ha il dretg da prender investa da tut ils cudischs, mussaments, protocols dalla suprastanza communal sco era d'auters acts ch'ei necessarias per controllar la gestiun generala. Ils commembers dallas autoritads ed ils emploiai communal san vegnir envidai da dar informaziuns a bucca ni a scret. Els ein obligai da dar informaziuns senza resalvas e corrispudent alla verdad. La CdG astga prender investa dils registers da taglia, denton buca dils acts dils singuls pagataglias.

Art. 17 Experts

En concordanza cun la suprastanza communal ei la CdG autorisada da consultar experts per far controllas specialas.

Art. 18 Cussegliazion e recumandaziuns

La suprastanza communal sa consultar la CdG sco istanza consultativa cunzun per giudicar fatschentas cun consequenzas finanzialmein considerablas, en connex cun proceduras da preventiv, dalla planisaziun da finanzas, da decisiuns da project, da contracts a liunga vosta e.a.v. La CdG sa era far recumandaziuns per mauns dalla suprastanza communal resp. dil cussegl da vischnaunca.

Art. 19 Obligaziun da discreziun

Ils commembers dalla CdG ein suttamess all'obligaziun da discreziun ufficiala.

IV. Termins, rapport e proposta**Art. 20 Termins**

Il preventiv ed il quen annual ston vegnir surdai alla CdG il pli tard sis jamnas avon la tractaziun entras il cussegl da vischnaunca. La CdG suttametia siu rapport e sia proposta sil pli tard 15 dis avon la seduta dil cussegl da vischnaunca all'autoridad che fa la proposta ed all'administraziun communal per l'exposiziun dils acts.

Art. 21 Rapport e proposta

Suenter haver terminau las controllas fa la CdG in rapport a scret ch'ei dataus e suttascrets da tuts commembers dalla CdG participai per mauns dil cussegl da vischnaunca. Quei rapport cuntegn ina cuorta descripsiun dallas controllas ch'ei vengidas exequidas, in giudicat dils resultats, ina posiziun davart la correctadad formala e materiala sco era las propostas. Il rapport e las propostas vegnan presentadas dalla CdG a caschun dalla tractaziun el cussegl da vischnaunca. Per tractar ils resultats dalla controlla ed il preventiv ha liug ina sesida comunabla dalla suprastanza communal e dalla CdG. Davart constataziuns da natira subordinada sa la CdG suttametter in rapport separau cun propostas corrispudentas per mauns dalla suprastanza communal.

V. Determinaziuns finalas

Art. 22 Entrada en vigur

Quest regulativ ei vegnius concludius ils 21 da fevrer 2014 dil cussegl da vischnaunca. El entra en vigur retroactivamein cun igl empren da schaner 2014.

Il president communal:
Francestg Cajacob

Il canzlist communal:
Andri Hendry